

Gaji rakyat Malaysia di Singapura, Brunei cecah RM64,000

Oleh **NUR ALWANI ZAFIRAH**
KHAIRUL

PETALING JAYA – Pendapatan rakyat Malaysia yang bekerja di Singapura dan Brunei Darussalam dilihat berada pada tahap mewah apabila ada yang mampu meraih sehingga RM64,000 sebulan.

Ketua Perangkawan, Datuk Seri Mohd. Uzir Mahidin berkata, kira-kira 66.7 peratus tenaga kerja Malaysia yang bekerja di

Singapura menerima gaji kasar antara SG\$1,500 (RM5,330) hingga SG\$3,599 (RM12,780) sebulan dan 18.5 peratus menerima gaji antara SG\$3,600 (RM12,800) hingga SG\$9,999 (RM35,530).

Katanya, bagi mereka yang bekerja di Brunei pula, 41.3 peratus menerima gaji kasar bulanan antara BN\$1,000 (RM3,550) hingga BN\$3,000 (RM10,660) dan 43.5 peratus lagi menerima pendapatan sekitar BN\$3,001 (RM10,670) hingga BN\$10,000 (RM35,550).

Tambah Mohd. Uzir, terdapat juga rakyat Malaysia yang menerima gaji melebihi RM35,000 sebulan.

"Jumlah gaji kasar bulanan tertinggi direkodkan di Singapura adalah SG\$18,000 (RM64,000) dan BN\$15,000 (RM53,300) di Brunei.

"Analisis juga mendapati, lebih daripada separuh rakyat Malaysia yang bekerja dengan kelulusan SPM (Sijil Pelajaran Malaysia) atau setara bekerja se-

bagai pekerja mahir dan separa mahir di kedua-dua negara itu.

"Bagi pekerja yang ada kelulusan sarjana muda dan bekerja sebagai pekerja mahir di kedua-dua negara ini, majoritinya berumur antara 25 hingga 34 tahun," katanya.

Dalam pada itu, Mohd. Uzir memberitahu, majoriti rakyat Malaysia yang bekerja di Singapura dan Brunei merancang untuk terus berkhidmat di negara tersebut.

"Selain itu juga didapati kecenderungan rakyat Malaysia yang bekerja di Brunei untuk berhijrah lebih tinggi berbanding dengan mereka yang bekerja di Singapura.

"Antara faktor utama rakyat Malaysia memilih untuk bekerja di Singapura atau di Brunei adalah peluang pekerjaan dan persekitaran kerja yang baik, gaji yang lebih lumayan serta kadar pertukaran mata wang yang tinggi," jelasnya.